

## 佛母经 1 卷

No. 2919

### 佛母经

尔时世尊入般涅槃。倚卧双告诸大众。吾今欲般涅槃。不见阿难及吾迦叶。来时语言。吾与汝不相见也。即使忧波梨往诣刀利天上。告吾母知。举身疼痛不可思议。愿母早来。礼敬三宝。尔时佛母于其中夜作六种恶梦。一者梦见珍山崩。二者梦见四海枯竭。三者梦见五月下霜。四者梦见宝幢幡摧斫幡花崩倒。五者梦见四火来烧我身。六者梦见两乳自然流出。尔时佛母说梦未讫。正见忧波梨从空而来。口问。圣人从何方来。颜容顛顛。面色无光。状似怯人。尔时忧波梨哽咽声嘶。量久不语。告言。佛母佛母。我如来大师昨夜子时舍大法身入般涅槃。故遗我来告。请眷属。尔时佛母闻此语。以浑埴自摸。如须弥山崩。遍体而现。如波罗奢花。闷绝躃地。时有二天女。将水[口\*孙]之。量久还惺。尔时佛母将诸徒众恭敬围遶。从刀利天下至娑罗双树间。正见如来。殓敛以讫。唯有僧伽梨衣。迭着棺边。钵盂锡杖挂其树上。有二师子。自剄而死。十大弟子向天号哭。尔时佛母手携此物而作是言。此是我子。生存在日持用此物。化导众生。此物今无主也。尔时佛母遶棺三匝。却住一面。闷泪而言告言。慈子。汝是我子。我是汝母。汝今入般涅槃。云何不留半偈之法。尔时如来闻母唤声。金棺自开。却坐千叶莲花台上。为母说法。

世间苦空      诸行无常      是生灭法  
生灭灭已      寂灭为乐

尔时佛母闻此法。以心生欢喜。还归本天。未至天所。住立虚空。心生慈悲。呜呼大哭。天地震动。泪下如雨。云中百鸟皆作哭声。一切恩爱会有别离。何其如来□□□□涅槃大般涅槃经佛。

【经文信息】大正藏第 85 册 No. 2919 佛母经

【版本记录】CBETA 电子佛典 Rev. 1.6 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 北美某大德提供

【其他事项】本数据库可自由免费流通, 详细内容请参阅【中华电子佛典协会数据库版权宣告】

---